

dicitur. Sic tibia quidem sua natura simplex est; sed quatenus suam peculiarem habet figuram & magnitudinem, tibia nominatur.

Verùm cum organi propriè dicti sit perfectam atq; integram edere actionem; partes verò simplices pleræque tales actiones non edant, sed saltem usum aliquem in actione præstent; & illa compositionis varietas, quæ requiritur ad edendas perfectas actiones, reperiatur tantum in dissimilaribus: hinc patet partes dissimilares in primis ac præcipuè actionum illarum organicarum instrumenta esse. Et propterea etiam Medici plerumq; pro eadem partem organicam & dissimilarem habere solent.

Tandem est quiddam, quod utriusque partibus, tam similaribus quam dissimilaribus, commune est, nimirum Unitas seu continuitas. Nam non solum totum corpus, sed etiam quælibet pars in nostro corpore, sive ut similaris, sive ut organica consideretur, una atq; integra esse debet. Itaque tertio ad sanitatem nostri corporis Continuitas seu Unitas requiritur, Unitasq; tertium est, in quo sanitas consistit. Atq; hæc tria si corpus nostrum obtineat, sanum est, & ad omnes actiones obediens aptum; horum verò si quid deficit, & à *συμμετρία* hac corpus declinet, egrum evadit. Verùm, ut Galenus, *de diffe. morb. c. 4.* monet, non quævis & exigua ab exacta *συμμετρία* declinationes mox morbo-

rum nomine censendæ sunt; sed eadem demum, quæ actionibus noxas, quæ sensu percipi possunt, inferunt. In eo enim spacio, quod est ab ea *ἀμετρία*, quæ morbi nomine censetur, usq; ad eam, quæ ad unguem salubris est, *συμμετρίαν*, multæ sanorum consistunt differentiæ, & magna est sanitatis latitudo. Quod Galenus, *1. de tuenda sanit. c. 5.* duplici ratione probat. Primò ex mutatione, quæ fit per ætatum vices. Cum enim, postquam editum in lucem est animal, perpetuò ejus temperamentum mutetur, neq; qualitatum eadem perpetuò, atq; in omnibus ætatibus ratio permaneat; ad sanitatem verò etiam temperamentum qualitatum requiratur: Sanitatem eandem perpetuò permanere, possibile non est. Deinde idem probat actionum, quæ à diversis eduntur, differentia. Nec enim omnes, qui oculos sanos habent, æquè acutè vident, sed alii aliis perspicaciores sunt. Ita etiam sese res habet in auditu, progressu, cursu, aliisque actionibus, quarum magna & inter sanos est differentia. Si itaq; tot sunt actionum differentiæ: tot quoque erunt differentiæ constitutionum, à quibus pendent; & proinde tot sanitates, non quidem secundum speciem, seu *κατὰ τὸ κοινὸν ἀπάσαις εἶδ' ὅ, ἀφ' ἧπερ ὑγίεια λέγονται*, verum *κατὰ τὸ μᾶλλον καὶ ἥττον* differentes. Et si quævis debilitas pro morbo habēda esset: *ἀειπάθεια* induceretur; omnesq; qui minus robore

Sanitatis latitudo.

*Dissimilari-
laris &
organica
pars sæpe
pro eadem
habetur.*

*Unitas
similaribus &
dissimilaribus
communis.*